

Kuuku ande mulume, kuuku ande mukashi, owuuku'shi, **YESU KIDISHITU** mukukumiine, na e n'obe kifulo ! Owuukushi, ku nkulusu bafwidile bantu bosu balume na bakashi ! We mwana mukinga, su we mununu ? YESU KIDISHITU bakufwidile n'obe namu.

... We ntomboshi, ngifi, sha madimi, nkitshishi a bibeshi, muntu a bisumanga ? YESU mukukumiine, na akyebe kukupaasha.

... We ndoshi mukata e ku mudimo wa Satana, kubanga ku bukinga bwobe, okwete kuyengyesha bantu be bungu mu kibundji kyenu, oyipaa bana bakinga, na bantu balume na bakashi, olwisha bikunwanga, na kweela maladi mu kifuko na kifuko, oluungu aba n'aba. Kwoso kwokidi be na moo , abasuuku pamwanda we bubu bukile, kifuko kiobe akikutoolo pa mwanda wa ndemo y'obe na bikudi biobe bibi. Mu kipindji kioyunguula weyipusha kiini kiodi mufikye mu kukita pa nsenga, okimbi kiini akikukitshisha bikitshiino bioso bibi biokwete kukita, weyipusha kipaso kiini kiodi mwibifikye ? Uuka kintu kimune'shi: sunga muuwa wobe wekala bubu, YESU mukukumiine na akyebe kukupaasha.

... We na maladi a sudi, ikutape ku mutwe mpa na ku ngwaa, wemushimise mana, matwi, mpembe, bilwishibwe mu kipaso kioso: uuka kintu kimune'shi: obe namu, YESU mukukumiine na akyebe kukupaasha.

... We songwakashi, okisha nsaa yobe mu kulwisha malunda a bangi pa mwanda wa buuwa bwa lukyebu lwobe, wotupakasha baloole bwobe ba kilongyelo, ku tulaasa, ku ma bureaux na mu ma quartiers. Pamo tobokatwiishe eyimi, tobokimbile bia kuluunga baloole bwobe, bakwan'obe, tobwebosheshe ngoshi munkatshi mwa makupi wobe; bangi tabafwile sunga'shi ba ki na maladi pa mwanda wobe, pa mwanda wa bulamalama bwobe na bwa meeso obe e buuwa. Weyele nkonko binobino pa mwanda wa muuwa wobe; bopu kumona bubu bwoso bwodi mukite na weyipusha kitshibilo kikutuudile Efile mukulu. Pa kwibiela meeshi, mbidi ayikwitshikila mashika pamwanda we mupushe'shi : Efile Mukulu

akatshibila bikitshiino bia bantu kiimu dingi efuku. Otomboka, owukushi nyi elungu dia kaalo adikutengyela na wekankamika kapeela na kwamba'shi, nyi mianda ya bisumanga, wende mpa na mu kuyeba kutuma nangunangu ya bu-muntu bwobe eshi : Efile Mukulu te kwanka nya.

... We songwalume mukite bintu bifwanene na bino, na ofiki ku bino bitshibilo bimune. N'obe namu wetuulu mu mulongo wa abapele Efile Mukulu bwa kutaadisha binangu biobe.

Kuuku'ande mulume, kuuku'ande mukashi, Satana akudimbi. Mu mishindo yoso, owuku akikwindjila. Sunga wekala na wawa mwikelo utumbakane, nankyebe kukulungula lelo'shi takwi kiodi mubande kushimisha nya, mwanda Efile Mukulu mu kifulo kiaye batumine mwan'aye bwashi afikye na akupaashe ku yaya mianda y'obe yoso. YESU mukukumiine n'obe'ni na akyebe kukusuula mu mase aye bwashi wekate mulumbulukye kumpala kw'Efile Mukulu.

... We mulume, mukashi, muana-mukinga, we binobino pa lusala mu lupitalo pa muanda wa maladi, wa masaku, wa kulungiibua, wa kulo'ibwa, wuuka kintu kimune : twe mushimine nya, kwi YESU ku lupese lwobe, mukukumiine na akyebe kukupaasha.

... We mukite kilubilo kikampanda, na lelo okyengye mu kashibo ka lukano, Yesu e kwanka bwa kukupaasha.

... We muina mudimo mukata, mfumu, muludiki mukata sha matalwa mwilumbulwile mbalo mu kifuko pa mwanda wa butshi, bwa kuluungana, bwa mianda ya bwakul'akule, bwa madimi, bwa mikanda ishi na mashina, wemwipewe bantu bosu bwa kufika ku twipatshilo twobe, n'a binobino kano kamukanda kabapono mu maasa mwobe: wuuka shi ta nkintu kia bisumanga nya. Yesu a kulungula shi sunga bioso biabia biodi mukite, mukukumiine obe namu. We mubale tulongo tungi na we mu basukye pa kupeta shi, sunga mianda y'obe na bubu bua mwikelo wobe, YESU mukukumiine obe namu. Biabia pusha abikulungula Mupaashi'obe : « Ta mbaaba be bi buwa be na lukalo na munganga nya anka bena maladi. Ntshimufikye mukwitanyina balulame, nya, anka bakitshi ba milwiso » (Mukandu wi buwa wa

Mâko kip. 2 kishingatshilo 17). Webipusha su? YESU aakula shi, bafwidile bantu bu'be . Omono, kwi kibelo kibawule bwobe, na kiini kibelo, nyi **YESU** nabene mu bu-muntu.

...Okaakula'shi we mwenyi kwi mwiilo wa Isalele ubaabadi abakankamika kwi Yesu na ano mayi : we mwina Afrique, mwina Asie, mwina Europe etc... wuuka'shi ano mayi a Mwanana e kwodi n'obe namu na pusha kiakia kiakulungula : « Eyaluuleyi kwandji na anukekala bapaashibwe, anwe bosu be kunfudilo a nsenga ! mwanda ami ne Efile Mukulu, na ta kwi ungi nya » (Mutemuki Esaya kipindji, 45, kishingatshilo 22) Okwete kwibipusha su ? Weambanga'shi we mufudiile, mwanda wemukyengyeshe ben'obe bikata, na wemulwishe miuwa ya ben'obe na wele meeshi'shi twena kiodia kupeta kwi Efile Mukulu nya We mwakule bino na biabia, pa mwanda wa milwiso yobe. Aye namu YESU akulungula'shi : « Lelo su bopusha eyi diande tokoposhanga eshimba diobe nya » (mukanda wa Bena Ebeleo, kipindji 4, kishingatshilo 7).

We na kano kakanda mu maasa mwobe, wuuka'shi : lelo ngi « di'obe » n'Efile Mukulu aakula'shi : tokoposhanga eshimba di'obe.

Bwa kufudiisha, Kikudi E Selele akupaa'ni ano mayi: « Nkipaso kini kiatukasuuku (kupanduka), su atupunganya kipandjilo ki buno bukata » (Ebeleo, kipindji 2, kishingatshilo 3). Kuuku'ande mulume, kuuku'ande mukashi, owuuku'shi, Efile Mukulu mupwe nkukumiina, wemupwe kuuka'shi YESU Mwan'aye e kwanka bwa nkupaasha. Twe mukilubilo'ni nya, Efile Mukulu akyebe kukubuula meeso na kano ka mukanda na a kulungula'shi : **«Mwanda Efile Mukulu bakishakisha kufula ba pa nsenga, pakwibapa Mwan'aye umune'Eleka, bwashi oso akumiina mwadi takufwa nya, anka apete muuwa wa looso »** (Yoano, kipindji 3, kishingatshilo 16). Biabia we kumpala kwa mianda ibidi ayikutekye osangule umune: KUKUMIINA NA KWIKALA MUPAASHIIBWE sunga'shi, OTUNE KUKUMIINA NA OKAPISHIIBWE. Oolo mu buwa bwaye bukata, Efile Mukulu akuleesha patooka eshinda dia kulonda : Aakula'shi

: «Nantuulu kumpala kwobe muwa na lufu, mwabi na malwa. Sangula muwa bwashi wekale nawo » (Mukanda wa Detelenome, kipindji 30, kishingatshilo 19). Okumiina kuteemesha Efile Mukulu su ? Sunga abiakula Mutumibwe Mpoolo'shi : « okwete kumona bupeta bwa buwa bwaye ku bisumanga, na bwa lwishinko lwaye, na bwa bula bwa lutengyelo lwaye, kushi kuwuka'shi kalolo k'Efile Mukulu akakutumumu mu kwilanga? Anka, mwiile bukopo bwobe na mwiile eshimba di'obe dishi na kwilanga, wekakila obe nabene nsuungu mwifuku dia suungu na dia kuleshiibwa kwa kiimu kilulame ki' Efile Mukulu» (Mukanda wa Bena-Loma, kipindji 2, kishingatshilo 4 na 5). Mbifundibwe'ni'shi : « Efile Mukulu eele eyi binobino kwi bantu'shi, boso mu mbalo yoso belangye; Pa mwanda mulumbuule efuku dimune diakatshibila nsenga yoso ishaalwe kiimu mu kululama » (Mukanda wa Bikitshiino bia batumibwe, kipindji 17, kishingatshilo 30 na 31).

Na mutumibwe Mpoolo, « etusendeela bwa Nkidishitu'shi: Yikalayi mu kipwaano n'Efile Mukulu » (Mukanda wa kabidi kwi Bena-Kodinda, kipindji 5, kishingatshilo 20), kumpala a saa kukila.

Kumiina kipwaano kibakupa Efile Mukulu. Bwa biabia abituungu welangye, mubadiile kuwuuka'shi, we mulwishi mukumbeene kiimu kilulame ki'Efile Mukulu, na dingi'ni okumiine'shi, YESU bakufuule kifulo na belubwiile aye namuinyi pa mwanda wobe. Ku nkulusu batshibiilwe kiimu kibaadi kipwandjikile ku milwisho yobe yi bungu bwashi Efile Mukulu akulekyeele. Ngifi baadi mubambwe mbwipi mwaye baukile'shi, kwakwa batshibiilwe kiimu kibaadi kikumbanyiniine bubi boso bubaadi mukite. Anka beyalulwile na lukumiino lwoyo kwi YESU na bamulungwile'shi : « Ontetekyeshe namu, ... Mwanana ». YESU bamwalulwile nka paapa'shi: «lelo uno'u okekala n'ami mu mpaladiso » (Mukandu wi buwa wa Luka, kipindji 23, kishingatshilo 41 mpa na ku 43).

Oolo, Mukanda w'Efile Mukulu awitulungula'shi

: « Biabia takuki binobino kiimu su nkimune kwi baaba be mwi Nkidishitu YESU nya » (Mukanda wa Bena-Loma, kipindji 8, kishingatshilo 1). Kwi boso babamutambwile aye bebapeele matalwa a kwikala bana b'Efile Mukulu (Mukandu wi buwa wa Yoano, kipindji 1 kishingatshilo 12), na ta kwi kintu su nkimune sunga muntu mulombeene kwi tulamuuna ku kifulo Ki'Efile Mukulu ki mwi Nkidishitu Yesu mfumwetu nya (Mukanda wa Bena-Loma, kipindji 8, kishingatshilo 39).

«Ne mwinunfundjile bino bintu bwashi nushinguule'shi nwi na muuwa wa ikalaika, anue bakumiine mwishina dia Mwan'Efile Mukulu » (Mukanda wa kumpala wa Yoano, kipindji 5, kishingatshilo 13).

Anukumiina namu kushinguula bi bungu mu MUKANDA W'EFILE MUKULU (BIBLE) na mu Mukandu wa'ye wi buuwa su ?

Nutekye tukanda twetu twa kubadika mu adresse eetu, sunga kwi bakwetu BENA KIDISHITU be peepi n'enu mu bibundji biatudi baleeshe kuno kuushi :

BA FRERES BENA KIDISHITU :

MBUJIMAYI: Bd L.D KABILA N° 61, Q. DIPA, COMM/DIULU (Tshikila Njinji)

LUBAO : Q.Révolution, Avenue Twendelee

KABINDA : Q. Congo I, Avenue Lumumba

MASANKA - MINGALA - MPEMBA NDALA

KAMAANA - MPENGYE

Éditeur:

**BPC - La Bonne Semence
France**

Réf: SA001KE

**Toi aussi Jésus t'aime
(Kisongye - Congo RDC)**

